

vniat et coniungat. Quod si Romanae Ecclesiae discretio prouida pro loci qualitate vel personarum cura aliquas in aliquo necessario duxerit dispensandum, aliae, quae simili dispensatione non indigent suum firmiter propositum custodiant et obseruent. Nulli ergo omnino hominum liceat hanc paginam nostrae confirmationis infringere, vel ei ausu temerario contraire. Si quis autem hoc attentare praesumserit, indignationem Omnipotentis Dei et Beatorum Petri et Pauli Apostolorum eius, se nouerit incursurum. Datum Lugduni idibus Nouembris, Pontificatus nostri anno III. “

E Wadingi Annal. Ord. Minorum Tom. I. p. 313. sq. Clarissae vetustissimis temporibus fuerant apud nos Vetro Budae, Tirnauiae, ac Posonii susceptae.

---

*A. Ch. 1247. Bela R. H. portiones terrae Bardfa per Teutonicos de Eperjes occupatas Fratribus Ordinis Cisterc. Ecclesiae S. Aegidii de Bardfa, metis designatis restituit.*

Bela, Dei gratia, Hungarie, Dalmatie, Croatiae, Rame, Seruie, Gallicie, Lodomerie, Cumanieque Rex: Omnibus Christi fidelibus, presentem paginam inspecturis salutem in omnium Saluatore. Ad Vniuersorum tam presentium quam posterorum notitiam, harumque serie litterarum volumus peruenire: Quod accedentes ad nostram presentiam quidam Fratres de Coprynincia, Cisterciensis Ordinis, apud Ecclesiam Sancti Egidii de Bardfa, prope Sarus commorantes, suis nobis curauerunt insinuare querimoniis, quod Theutonici de Eperies metas terrae ipsorum Bardfa vocabulo, vbi supra dicta Ecclesia est sita, auctoritate propria de-

struxissent, eleuantes in praeiudicium et grauamen ipsorum metas falsas de nouo, quarum occasione terminos terrae praedictorum Fratrum transgredere attentantes, non modicam partem terrae eorundem indebite occupando. Verum, quia nostri incumbit officio, iura quorumlibet illibata et illesa obseruare, nostro fideli Tegus Comiti de Sarus, dedimus in mandatis, quod tam terram Bardfa, quam etiam alias terras ad ipsos fratres pertinentes, quae fuerant ab eis alienatae, nostra circuiret auctoritate et erectis nouis metis iuxta veteres metas, easdem restitueret Fratribus antedictis. Idem vero Comes Tegus hoc nostrum nolens preterire mandatum, sicut nobis retulit viua voce, et etiam in litteris suis insinuare curauit, totam terram Bardfa vndique circum eundo et nouas metas iuxta veteres erigendo, memoratis Fratribus restituit, et vt de cetero tota materia quaestionis controuersae sopiretur, easdem metas, prout in litteris ipsius Tegus Comitis vidimus contineri, suo ordine, nostro fecimus interseri priuilegio, quae tali ordine distinguuntur; Prima meta incipit a quodam riuulo, qui nuncupatur Kisthopul, et ibi immediate tenent metas cum Cruciferis de Gyboltho, ab hinc ascendit versus Aquilonem per Syluas, peruenit ad quemdam montem; vbi oritur quidam fluuius, qui vulgo dicitur Orronospot-hok; deinde vadit per syluas ad caput cuiusdam riuuli, qui vocatur Monupothok; inde vero transit per montana ad vnum fluuium, qui dicitur prichikyn; ab hinc descendit per syluas ad caput cuiusdam riuuli nomine Kysberetnek; inde vero protenditur ad Lopuhmezew, et ibi est meta terrea; ab hinc vero transit ad Burcuth, deinde ascendit

ad montem qui dicitur Macowcha; inde vero vadit ad caput cuiusdam riuuli nomine Breznicha; deinde protenditur et transit ad caput vnius riuuli nomine Nöggrabovch, et idem Grabovch intrat in quemdam fluuium Thopul nomine, et inde vadit per syluam ad caput cuiusdam riuuli, nomine Kiolocoycha; inde vero vadit per syluosam terram ad Chellewsmezew, et ibi est meta terrea; inde vero transit ad praeuium riuulum, qui nominatur Thorycha, et per eundem riuulum Thoricha, intrat in aquam Thopul et ibi terminatur. Item prima meta predii, quod vocatur, Zwkchu incipit in littore fluuii Zwkchu a parte orientali, et vadit ad partes meridionales, inde vero transit per planiciem ad dimum, qui dicitur Reketiabucur, deinde ad viam regalem, inde vero per nouas et veteres metas cadit iterum in Zwkchu, et sic terminatur. Item prima meta predii Delnafew, quod pertinet ad fratres predictos, incipit a parte Orientali et vocatur Sydovpothok, vbi sunt mete terree, et per regalem viam vadit ad fluuium Delnafew, et per eundem fluuium Delnafew, et per eundem fluuium ascendendo, vadit iterum ad Thopul, deinde per syluosam terram reuertitur ad Sydopotoka, ad metam priorem et sic finitur. Vt igitur haec nostra descriptio salua semper et inconcussa permaneat, ad instantiam fratrum sepe dictorum presentes concessimus litteras, dupplicis sigilli nostri munimine roboratas. Datum ab incarnatione Domini Millesimo, ducentesimo, quadragesimo septimo. Septimo idus Nouembris, regni autem nostri anno tredecimo. “

Transumtae a Wladislao R. H. anno 1500. ab Ecclesia de Jaszow 1547. eruit D. Podhrásky.